


En memoria da

Stiafen Valier, Camischolas

5.9.1978 nr. 71

(Corr.) Dacuort hiel jeu entupau il Stiafen. Jeu hiel gratulau ad el per siu examen sco inschignier da construcziun bassa dil Tecnicum dalla sera e sundel s'interessaus da ses plans futurs. El hagi avon buca ton ditg entschiet ina nova piazza tier la firma da cement Caluori a Termin (Trimis), nua ch'el hagi da far specialmein lavurs da calculaziun e da statica, rispunda el plein curtesia. Sin sia fatscha resplendeva igl anim da saver tschaffar ussa la veta per propi pil cavez. El haveva el senn da buca schar dar l'aura per ils larischs. Deplorablamein ha ei denton duiu esser auter. La mesjamnaserà, ils 23 d'uost, serasa la tresta nova che Stiafen Valier seigi sedisgraziaus mortalmein mond suenter crappa enasium la Val Giuf. La consternaziun ei gronda! Ins sa buca capir che quei giuven plein veta e curascha ei buca pli denter nus.

Stiafen Valier ei naschius ils 25 da december 1953. Suenter ch'el ei staus ord da scola fa el igl emprendissadi da dessignader da construcziun bassa tier il Cantun. Havend el ina buna imaginaziun, finescha el quel suenter treis onns cun bien success. Lu fa el recrut ed entscheiva ina nova piazza tier la firma Baustoff AG, Cuera. Suenter entgin temps mida el quella per entrar el biro d'inschignier Rezia, Cuera. En quei mument sedecida el era da far il Tecnicum dalla sera. Egl interval da biabein 4 onns frequenta el la scola la sera, fa ils pensums el temps liber e seprepara per ils examens semestriels e per il diplom. Malgrad che quei ha duvrau bia perseveranza ed energia, ha el buca priu il mund si dies. La sonda e dumengia fageva el il bia sport, seigi quei cun ir per la pezza ni cun ir cun skis. Denteren deva el buca nuidis in jass. Il Stiafen haveva anflau in equilibr exemplaric denter lavur e recreaziun. El saveva tgei ch'el leva, el era resoluts e decisivs. Che quella qualitat fuss stada da grond avantatg per sia veta futura ei gnanc tgisa. Quei che fageva il Stiafen denton propi simpatics era sia curtesia e beinvulientscha.



Il fatg ch'ils ligioms creai entras quellas qualitads ein ruts aschi abruptamein, fa mal, specialmein als geniturs e fargliuns ed als numerus amitgs e collegas. Nus lein denton mantener il Stiafen en buna memoria, engraziand per il bien retscharts dad el e sespruond da realisar era en nossa veta enqualga schetga empau curtesia e beinvulientscha. Il Stiafen ruaussi en pasch!

La Ligia Romontscha informescha

(LR) En sia sesida dils 25 d'uost 1978 ha la suprapostanza dalla LR elegiu sco successeur da giuvna Genoveva Arquisch giuvna Corina Gilly, da Zuoz/Madulain e Zerne, sco **secretaria-contabilista** dalla LR. Giuvna Corina ei dapresent secretaria dalla societad da traffic dil marcu da Cuera. Ella vegn ad entscheiver siu niev pensum igl emprem da december 1978. Nus giavischin a giuvna Corina satisfaziun e success sin siu niev camp da lavur.

La suprapostanza ei plinavon s'occupada da damondas da structuraziun dil niev secretariat ed ha tractau entginas damondas da subsidi. La proxima radunanza da suprapostanza vegn salvada ils 14 da settember a.c.